



Terenga 4: Hōtaka 31 – ‘a’ + tūwāhi

He Mihi

Kia ora mai anō rā koutou kua tau mai ki te whakarāwai i te reo Māori ki te mahi a te kupu. Ko tā tātou i konei, he whai kia tika, kia rere, kia Māori anō hoki te reo tuaukiuki i waiho mai ai ki a tātou.

Hei Mahi Whakarongo

Anei rā ngā whakamārama a te tākupu nō Tūhoe, a Wharehuia, mō tētehi whakataukī nā Taha Rākau nō te rohe o Tūranga-nui-a-Kiwa hei whakautu i ngā kupu whakatonu a tana hoa, a Te Angiangi. I a koutou e whakarongo ana ki ana whakamārama, tēnā whakautua ēnei pātai:

- 1) E matakū ana a Te Angiangi i te aha, i puta pērā ai ana kupu ki a Taharākau?
- 2) He aha te ingoa o te kākahu o te Māori hei ārai i te ua?
- 3) He aha ki ō whakaaro, te tikanga o te runga me te raro i roto i te whakataukī a Taharākau?

He Whakamārama

Ko te tūwāhi he kupu wāhi ka whai mai i muri tika tonu i te kupu ‘i’, i te kupu ‘ki’ rānei. Tirohia ēnei tauira:

E haere ana au ki Tūrangawaewae. [E haere ana au ki a Tūrangawaewae ✗]
(tūwāhi)
I hūnuku mātou i konei ki Tāmaki.
(tūwāhi) (tūwāhi)

Mehemea he tūwāhi te **tāhu** o te rerenga kōrero, ka noho te pū ‘a’ ki mua i te tūwāhi. Tirohia ēnei tauira:

He makariri a **waho**.

He koi a **runga**, he pūhuki a **raro** o te taiaha. [He koi te runga... ✗]

Peitahia a **waho** o te whare, kaua a **roto**.

***Kia mataara:** Kāore he tohutō i te pū ‘a’ nei.

Hei Mahi

He aha ēnei mea?

1. He mā, he kōwhai hoki a roto, he āhua parauri a waho.
2. He mārō, he waiporoporo hoki a waho o ētehi, he āhua kōwhai nei, he mā rānei a roto. He tino reka tēnei kai i haria mai e ngā tūpuna ki tēnei whenua.
3. He kirihou a waho o te mea nei. He matapihi tōna hei whakaatu i ētehi o ana kōrero. He tau, he tohu hoki kei te mata o runga. Kitea ai tēnei mea i roto i te akomanga, i te tari rānei.

Whakautu:

1. He hēki.
2. He kūmara.
3. He pūrere tātaitai.